

Mafutaga Fa'afouina Faifeau ma A'oa'o Tausi Nu'u

Aokuso, 2016

“ ‘Su’esu’ega i Aulotu’ ma le Galuega Fa’afaifeau a le EFKS” **(Congregational Studies and EFKS Pastoral Theology)**

1. Faatomuaga

E faatalofa atu i le paia o le mafutaga i lenei taeao matagofie ua faa-avanoa e le Atua mo mafaufauga faale agaga i lana galuega ma lo tatou valaauina. E mua’i faatalofa fo’i i lau susuga i le Ta’ita’i Mafutaga o lenei taeao, faapea susuga i Toeaiina, ma le mamalu i le afaigaluega paia a le Atua ua aofia i lenei taeao. Malo le soifua manuia.

Ua fa’aulutalaina lenei tusiga– **“‘Su’esu’ega i Aulotu’ ma le Galuega Fa’afaifeau a le EFKS”**.

Ua manatu i lenei taeao sei o tatou toe to manatu pea i le galuega fa’afaifeau (*Church ministry*) mai totonu lava o le galuega i lo tatou galulue ai ma faatino le finagalo o le Atua i aulotu ma ekalesia. Ua tupu se manatu ona ua agai pea i luma le soifua galulue ma suesuega, ma māua ai le taua o nisi foi metotia ma faiga e fesoasoani ai i le malamalamaina pea o la tatou galuega fa’afaifeau. E i ai pea le manatu ua sili lo outou silafia i ia mataupu uma aua o loo outou militino pea ma le galuega i aso uma. O le mea lea e taua ai lo tatou lagona pea ole loto faafetai i le Atua, ona o lana pule fa’asoa mai i le atamai ma le silafia, le onosai ma le fa’apalepale, le agaga finau ma le tauivi i lana feau, ua tatou molimauina ai pea le matagofie o le Atua i totonu o lana galuega paia i aso ta’itasi. Peitai e talitonu foi e leai lava se faiva e aunoa ma ni ona faafitauli ma ni lu’itau mo le au faigaluega, ao tatou malaga pea i luma.

2. O leā lea mea ua ta’ua o ‘Su’esu’ega i le Aulotu’?

O suesuega i Aulotu poo Faapotopotoga Lotu o se tasi o la’asaga taua mo le soifua suesue o le afaigaluega a le Atua, ma suesuega faapitoa i le Galuega faafaifeau, na amata lona fa’atauina mai i le tausaga 1970. Talu mai lenei taimi, ua faatupulaia le tele o tusitusiga ma suesuega ua faamauina e uiga i lenei foi ituaiga o suesuega faale mafaufau i aulotu ma ekalesia. Sa tele metotia lelei na avea ma meafaigaluega taua o le galuega faafaifeau a le Ekalesia i le lalolagi a’o le’i o’o mai i lenei taimi sa fesoasoani, ma o loo fesoasoani pea i le malamalamaina o le ola o le aulotu (*congregational life*). Peitai o le tula’i mai foi o lenei metotia ma se ta’iala fou i lenei vaitaimi, ua o se fesoasoani tele i le au faigaluega tofofi a le Atua i lea ekalesia ma lea ekalesia. E le gata ua fa’aopoopo i faiga masani e pei ona ua i ai ma faaagaina nei, ao se taiala foi e fa’alautele ma faamanino atili ai faale mafaufau nisi o faiga faatino o le galuega sa le mamafa tele i ai se manatu i nisi taimi.

O le mataupu la i ‘Suesuega i Aulotu’ (Congregational Studies): o saililiga loloto e faia i se aulotu e le faifeau (poo se tasi foi o lana matafaioi faapitoa lea o le su’esu’e i

aulotu,) ina ia mafai ona malamalama ma manino i le olaga lautele (social context) o le aulotu o i ai; ma le fatufatuaiga o le aulotu o se tino e tasi i lona maopoopoga faa faapotopotoga, aemaise o ana galuega fai, o lona faavasegaga faa-aulotu (structure), ma lana filosofia (congregation ethos) fa'a-aulotu.

Ua lē faigofie lava ona tau faamatala i le gagana le loloto o le faamoemoe o lenei suesuega a le faifeau i le aulotu. E manatu foi ua mafatotoga le mafutaga nei i a outou susuga i Faafeagaiga i le uiga o le taumafai atu o le pepa e tau faamatala le uiga ma le matafelefele o lenei ituaiga suesuega.

E tolu ni uiga taua (*characteristics*) lautetele o lenei su'esu'ega i aulotu e tatau lava ona silafia - e faigofie ai foi ona malamalama ma faatino le sailiga.¹

- i. Muamua, o lenei suesuega e **laualuga ai le agaga faafetai ma le fiafia i le taua ma le aoga o le olaga faa aulotu mo tagata taitoatasi ae faapea foi faalapotopotoga e pei ona molimauina i le eklaeisa.** Ia le itiiti le alagaina o lenei faafetai ona o le sao o aulotu taitasi ma a latou aganuu i le faatupulaia o le 'tino o Keriso' i le lalolagi ma le faalauteleina o le Talalelei a Iesu i tagata. E tele faalapotopotoga eseese ua mafai ona faamaopoopo i ai tagata soifua e saili fesoasoani i le fia maua o le loto to'amalie, o le mafanafana o le ola mafuta, ma maua ai le fiafia loloto faale Atua. O mafutaga fa'ale aiga, mafutaga fa'alenu'u, mafutaga fa'a ta'aloga, mafutaga fa'a galuega, ma mafutaga fa'ale atunu'u e pei ona molimauina i atunuu i fafo. Peitai e tulaga ese lava le tulai mai o mafutaga fa'a aulotu o se nofoaga e maopoopo i ai i latou ua talitonu ma fa'atuatua i le Atua - le fanau a le Atua o e ua talitonu i le taua ma le aoga o le ola faatasi fa'a aulotu tusa pe eseese lanu, o gagana, eseese ma le faitua o o latou olaga. Ae mafua mai fea lea ituaiga uiga taua fa'a aulotu? Muamua, e mafua mai ina ua mautinoa le mafanafana faale agaga o le tagata e maua i totonu o se aulotu pe a moni ma laina tutusa lo latou fa'atuatua i le Atua. Lua, e tupu mai pe a lagonaina e tagata le fou pea o fa'aaliga o le auai mai o le Atua i olaga ma galuega a tagata ese'ese o le aulotu. Ma lona tolu, o le tulaga ese ai o le mafutaga fa'a aulotu mai isi fa'alapotopotoga masani o auai atu i ai nisi tagata.
- ii. O 'Su'esu'ega i Aulotu' ua amanaia ai le loloto ma le mātafelefele o le olaga fa'a aulotu. E lē na o ona o mai i le Aso Sa e loloto ma toe fo'i i le fale, pe na ona fa'apotopototo mai e fai le saofaga o tupe mo le atina'e o le galuega, le alofa o le faifeau, ma isi mea, ae ia goto ifo i loto ma agaga o tagata le taua o ia mea i lo latou olaga fa'ale faatuatua i le Atua. E lē gata i lenei, a ia mautinoa foi e tagata, o le faapotopotoga lotu lea, e fitoitonu mo latou ma e tatau ona tausolomua i latou ona galulue fa'atasi e fa'aolaola ma fa'amaopoopo le

¹ Brynolf Lyon, "What Is the Relevance of Congregational Studies for Pastoral Theology?," in *The Blackwell Reader in Pastoral and Practical Theology* ed. James Woodward and Stephen Pattison (Victoria Australia: Blackwell Publishing, 2000). 259-261

galuega a le Atua. Masalo o le tasi lenei vaega o le galuega fa'a aulotu a le EFKS o va'aia ai pea fa'afitauli ma e taua ai ona faia lenei ituaiga suesuega e silafia ai e le aufaigaluega faifeau tafa eseese o le fa'afitauli, ma iloa ai foi e le aulotu, e i ai lo latou sao i le fa'afitauli e tatau ona foia ina ia tupu ma ola le galuega a le Atua. Masalo o i e ono mea ai le talitonuga a le atunu'u - e 'soalaupule' ai le faifeau ma le aulotu i ala manino fa'ale Atua

- iii. O 'Su'esu'ega i Aulotu' e lē tāfa tasi i se ituaiga su'esu'ega fa'ale atamai lona faatinoga, ae e tele mafaufauga ma le poto salalau o nei aso e mafai ona fa'aaogaina i lenei ituaiga suesuega e maua ai se atoaga e uiga i se aulotu. O lona uiga e lē gata ina tele iutaiga o atamai suesue (*multidisciplinary*) e aofia i lenei suesuega ae e feāiā'ai foi (*interdisciplinary*) nei atamai eseese i se tulaga e matua loloto ai ni mafaufauga e maua ma lautele ai le va'ai fa'a faifeau i lana aulotu ma le uiga o lona ola fa'a aulotu.² O le fa'ata'ita'iga, e lē na o se va'ai fa'afaifeau (*pastoral theological strand*) e tuli'aupū, ae e aofia ai ma le va'ai fa'a tagata suesue i tagata ma o latou tupu'aga ma siomiaga (*anthropological strand*), le va'ai fa'a le mataupu silisili (*theological strand*), le va'ai fa'a saikolosi (*psychological*), le sa'iliga lautele i le foafoaga ma le uiga o lo latou ola ma agafeso'ota'i (*sociological strand*), le vaai fa'a fa'alapotopotoga (*organisational studies strand*) atoa ai ma isi.³ O le mātafelefele lea o nei tafa o lenei su'esu'ega e matua taua lava mo le faifeau Samoa ma lana galuega fa'a faifeau.

E ui lava la i nei uiga eseese o su'esu'ega i aulotu, ae ao ona iloa mautinoa, ia fa'atumauiina pea le mamalu ma le ogatotonu o le aulotu i taimi uma (*integrity and centrality of the congregation*). Ia lē avea foi le suesuega ua faia ma auala e faaitiitia ai le mamalu tausā'afia o le aulotu. Ia 'aue nei na o se fa'ata'ita'iga o ni sailiga faale atamai o se faigaluega, ae fai ma ala e se'e ese ai ma le mamalu masani tuto'atasi o le faapotopotoga lotu.

3. Feso'otaiga o le 'Su'esu'ega i Aulotu' ma le Galuega a le Faifeau Samoa?

Aisea e maumau ai fua le taimi o le Faifeau Samoa e fai ai le su'esu'ega o lana aulotu? E mafua ona fai, ona e i ai lona feso'otaiga taua ma lana galuega e tatau ona ia silafia. E tolu (3) ni ala e mafai ona feso'otai ma aoga lelei ai lenei 'Suesuega i Aulotu' mo le galuega a le Faifeau.⁴

² Ibid. 261

³ Helen Cameron et al., eds., *Studying Local Churches: A Handbook* (London: SCM Press, 2005). 43ff

⁴ James R Nieman, "Congregational Studies," in *The Wiley-Blackwell Companion to Practical Theology*, ed. Bonnie J Miller-McLemore (West Sussex, UK: Wiley-Blackwell Publishing Ltd, 2012). 133 – 142; see also John Williams, "Congregational Studies as Resource and Critique for a Mission-Shaped Church," *ANVIL* 26(2009). 243 - 253

- i. Muamua, o le faia lelei o se 'suesuega i aulotu' e mafai ona fesoasoani ai i le saga fa'alolotoina o le taua o le galuega laveai ma le galuega fesoasoani fa'afaifeau mo le aulotu atoa. Ua masani ona tatou tulimatai le auifaigaluega tofofi fa'au'uina a le Atua (faifeau ma aoao fesoasoani) peiseai ua na o i latou e mafai ona faia lea galuega mo le aulotu. O lona uiga e foliga mai ua le mafaia e nisi tagata kerisiano faatuatua i le Atua o i totonu o le aulotu, ona ofoina atu se galuega laveai mo isi tagata. Peita'i o le loloto o se 'suesuega i le aulotu' – i tagata, o agava'a, o taleni, ma lo latou malosi faale mafaufau, - e iloa ai o lo'o i ai foi nisi uso Kerisiano i totonu o le li'o o le aulotu, e mafai ona lagolago mai i le galuega a le faifeau, pe afai e silafia ma fa'aaogaina lelei e le faifeau o latou agava'a ma meaalofoa a le Atua ua i ai latou.⁵ O se fa'amāmā avega tele lea mo le galuega a le faifeau pe afai na te fa'ataoto lelei ni alafua manino ma le faigofie, e faatino ai lea lagolago mai a le aulotu.

E lē na'o le galuega asiasi (*visitation*) ma lana galuega faatalanoa fesoasoani (*counselling*) ua atoa i ai le faiva laveai a le aulotu. O pesega ma viiga i sauniga lotu, o le lauga a le faifeau, o le tapuaiga a le aulotu, o ana suesuega i le Tusi Paia, o talosaga fa'aauau, o mafutaga i itutino eseese o le aulotu, ma le ola fefa'auouoa'i ma fetausi a'i o tagata i totonu o le aulotu, o galuega tetele ia e mafai ona fa'ama'ite i se tulaga manino pe a sologa lelei 'suesuega i le aulotu' a le faifeau.

- ii. O lona lua o ala e fesoasoani ai lenei su'esu'ega mo le faifeau Samoa ma le aulotu lava ia, o le iloa manino ai e le aulotu lava ia o ana tiute faatino e tusa ona a'oa'o mai le Tusi Paia, o le auai lava lea fa'ale agaga i le 'ola fa'a aulotu' (*congregational life*). Tele o taimi tatou te manatu o le tagata su'esu'e i mataupu silisili (*solitary theological scholar*) ma ana su'esu'ega faifai pea o iinā o loo ta'oto ai le mataupu silisili moni (*real theology*) e ao ona mulimuli ai tagata uma. Peita'i o le 'galulue faatasi o le faifeau ma le aulotu'⁶ i le faatinoga o le suesuega, o se avanoa lelei lea e molimauina ai e le aulotu lava ia, le silisili ese o le Atua sa auai i a latou galuega fai ua mae'a, o galuega o fa'aauau pea, ma galuega o ta'oto i le lumana'i o fia fa'atino. O lona uiga e taua tele, aua o le toatele lava o tagata o le aulotu latou te lē lagonaina i le tele o taimi le taua fa'ale agaga o o latou faiva fa'atino ma nisi o auaunaga fa'ale ekalesia o punonou ai. Atonu 'ai foi o le ala lea e fai ai ma tau solomuli nisi i le galuega; o nisi ua tu'ufesilisili poo leā ea le uiga o nei mea e saga fai ai pea; pe o iai ea ni fa'asinoga fa'ale Tusi Paia o nisi mea o faia pea e le ekalesia.

- iii. Ma lona tolu ae le itiiti ai lona taua, o 'su'esu'ega i aulotu' ua fesoasoani e fa'aleleia atili lo tatou auai ma militino fa'atasi ma le aulotu i lana auaunaga e fāufāu ma toe fafau atili le sosaiete e ala i lana galuega fesoasoani mo tagata. O le lelei ona fai o lenei su'esu'ega e fa'aoloa atili ai lo tatou malamalama'aga i le lavelave o le olaga

⁵ John Patton, *Pastoral Care in Context: An Introduction to Pastoral Care* (Louisville, Kentucky: Westminster John Knox Press, 1993). 5ff

⁶ O loo faaigoaina e Cameron, Helen, Philip Richter, Douglas Davis ma isi i le tusi, *Studying Local Churches: A Handbook*. London: SCM Press, 2005., lenei suesuega fai faatasi a le faifeau ma le aulotu o le 'Action Research method'

fa'a aulotu – nisi o mea e lē manatu le aulotu e tatau ona fa'ailoa lautele, faapea foi ma nisi o meaalofa a le Atua o umia e le aulotu, ae latou te lē o silafia. O lona uiga e mafai ona faapea se manatu, o lenei su'esu'ega o se uo mamae a le faifeau Samoa e fai ma ana pa'aga nate iloa ai le aoga o le aulotu mo ia ma lana galuega fa'afaifeau; ae o se fa'amalama matala foi mo le aulotu latou te iloa manino ai le aoga o le faifeau Samoa i lo latou ola faale agaga aemaise lona sao i le tapu'eina o le soifua o a latou fanau o nei ma taeao.

4. Va'aiga Fa'ale Mafaufau E 'Su'esu'eina ai Aulotu'

Atonu e faigofie ona tatou su'esu'e i aulotu pe a va'ava'ai faale mafaufau i ni faamalama (*frames*) se fa (4) e autilo ai i totonu o se aulotu ma sailiili atili ai⁷. O le uiga o nei fa'amalama e fa - o vaega eseese ia o le olaga o le aulotu e tatau ona asiasi i ai le sa'iliga o le a faia.

- 1) O le Aulotu o se ***Faalapotopotoga Ola*** (*The ecological frame*). O lenei va'aiga fa'ale mafaufau ua tausisi lava ina taga'i i le aulotu o se fa'alapotopotoga mautū a le Atua (*an organism*) i totonu o lona siosiomaga o tumu foi i isi fa'alapotopotoga fa'apea, o lo'o galulue fa'atasi mo le manuia o le olaga lautele ma le olaga fa'ale tapuaiga o tagata. O lona uiga ia silasila i le aulotu ma lona si'omiaga lautele e aofia ai le olaga fa'ale lotu, fa'apolokiki, ma mea tau i le tamaoaiga i atina'e ma aga feso'otai, ma tupe o lo'o fa'agaoioi ai mea uma. E lē gata i totonu lava o le aulotu ia, a'o le va feagai ai ma isi fo'i aulotu o loo felāta'i.
- 2) O le Aulotu ma lona ***Olaga Faale aganu'u Faapitoa*** (*The culture frame*). E taua i lenei vaega o mafaufauga le silafia lelei o le ituaiga olaga o ola ai tagata ma lo latou va feso'otai i taimi uma aemaise le fa'agaoioiina o galuega fa'a aulotu. O lona uiga e tatau foi ona saili le ituaiga mafaufauga o tagata ma lo latou ola fa'ale faatuatua e afua ai ona auauna i le Atua e ala i le aulotu ma ni mea taua o lo'o latou tulimata'i e fia maua ma va'ai i ai i le lumana'i. E taua le tala'aga o le aulotu (stories) i ona tagata, o tapuaiga, o suesuega i le Tusi Paia, mafutaga eseese, o ta'alogaga ma isi mea fa'apena mai le amataga e o'o mai i le taimi o le su'esu'ega. O le galulue fa'atasi i so'o se feau a le aulotu e tutupu ai nisi o uiga taua e fa'apitoa lava i ai latou. O ia mea uma o se fa'amalama manino lea e mafai ona iloa ai se aulotu ma lona olaga fa'a fa'apotopotoga ola.
- 3) O le Aulotu ma ona ***Puna'oa Faapitoa*** (*The resources frame*) O le tulaga i le malosia fa'ale tamaoaiga ma le gafatia fa'ale tupe o tagata o le aulotu o se vaega taua e tatau ona malamalama i ai le faifeau. O meatotino i fale ma

⁷ Nancy T. Ammerman, Jackson W. Carroll, Carl S. Dudley, & William McKinney, *Studying Congregations: A New Handbook* (Nashville: Abingdon Press, 1998).14 - 16

fanua, o lona tala ave i le lelei o le ola fa'aleagaga ma le tausiniō o tagata i mea lelei i totonu o le nu'u ma le sosaiete lautele, o mea taua ia e tatau lava ona amanaia lelei i nei su'esu'ega. E taua tele foi ona silasila i meaalofo a le Atua o fa'atamaoigaina ai tagata lolotu. O o latou agava'a, le atamai ma taleni ese'ese e mafai ona auauna ai i le galuega a le Atua, o le tamaoiga lilo lena e masani lava ona la'aloa ai su'esu'ega taua fa'apenei. Ia manatua, o le lelei ona sa'ili'ili, o le fa'amaoni foi lena ona fa'atino le galuega a le faifeau e fa'avae i luga o molimau manino, mautu, ma le atoatoa ua aoina mai i le sa'iliga.

4) O le Aulotu ma ana **faiga masani fa'a Pulega** (*The process frame*) E tofua le aulotu ma a latou faiga e faia ai fa'aiuga taua pe fofo ai foi ni fa'afitauli tugā e tutupu mai i lona olaga fa'a aulotu. I le va'ai mai i lenei fa'amalama, e taula'i le silasila i faiga masani fa'a aulotu o lo'o mafai ona su'i fa'atasi ai lona olaga masani ma uiga o tagata. E fesiligia ai le ituaiga ta'ita'iga (*leadership*) ma le faiga o fai a'i; ae pe fa'apefea foi ona faia fa'aiuga, ma faia feso'otaiga faa aulotu i le va tagata. O le tasi lenei fa'amalama taua tele aua a manino lelei i le fa'agasologa o mea (*process*), o le a faigofie ma vave fo'i ona fa'atino so'o se galuega ma poloketi i le ola i le tino o le aulotu, ma lona soifua fa'ale agaga.

5. O le Metotia!

O le fesili taua lava: e faapefea la ona fai lea "Su'esu'ega i Aulotu"?⁸

O le a na ona faamatogi atu i se faiga faigofie ma pu'upu'u ona e popo'e i le taimi fuafuaina o lenei folasaga. Ae e i ai faiga taua lava e tatau ona mulimulitu'i i ai, ina maua le atoaga o le sa'iliga ma aoga mo se faamoemoe fuafuaina.

- Ia sailiili i meataua ma tusitusiga fa'amaumau lelei a le aulotu (*artefacts and important documents*)
- Taumafai e fofola se fa'afanua o taimi ma mea tutupu e aupito taua i le olaga o le aulotu i se faiga manino ma le malamalama gofie (*use a timeline*)
- Ia fa'atalanoa tagata ta'itasi ma vaega ta'itasi (*groups*) o le aulotu i nisi o mataupu o fia maua i ai se malamalama'aga. O le fa'amatalaina o tala o le aulotu (*telling the church story*) o se auala aoga ma le taua e maua ai tala'aga o le ekalesia o nonofo ma tauave e tagata lotu (*ecclesial ethnography*).⁹
- O fa'amaumauga fa'afuainumera ma sailiga i amioga a tagata (*attitudinal survey*)

⁸ Williams, "Congregational Studies as Resource and Critique for a Mission-Shaped Church". 244 - 245

⁹ Ibid. 245; see also James F Hopewell, *Congregation: Stories and Structures* (London: SCM Press, 1987). 18 note 3

- O le savalivaliga fa'asamasamanoa i totonu o le lotoifale o le aulotu e mātau faiga tu'ufa'asolo i le olaga o le aulotu (*patterns of people's movements and activities*)
- Ia i ai se api o le su'esu'ega (*journal*) e fa'amaumau ai mea uma
- Ia faia pea ni fefa'asoa'iga o mafauauga fa'ale agaga a tagata o le aulotu e uiga i lo latou talitonuga fa'ale fa'atuatua mai lea taimi i lea taimi; aemaise le mafutaina o le aulotu e le Atua i a latou polokalame ma a'oa'oga fa'ale agaga e saunia e le faifeau i vaiaso ta'itasi.

A silasila la i nei vaega uma o le suesuega, tatou te matauina ai le telē ma le lavelave o suesuega e tataua ona faia ma le faamaoni, ina ia moni foi ma faamaoni le tali mai. Atonu e mafai ona faapea se manatu, ua talafeagai lava i le faifeau o le aulotu lava latou ona nafa ma lea galuega telē ma le faigata. Ua na o le faifeau foi e faigofie ona talanoa ma fa'asoa i ai tagata o le aulotu e uiga i o latou manatu ma talitonuga i le ekalesia ma lana misiona.

6. O Le Galuega Fa'afaifeau A Le EFKS - Nei Ma Taeao

E pei ona ou taua i le taimi muamua, e ui ina ua leva ona feagai le aufaigaluega faifeau ma le galuega tausī aulotu, ae talitonu o loo i ai pea se avanoa taua i le finagalo su'esu'e o le faifeau e amanaia ai lenei metotia sailiili i le galuega. E lē ina ia su'esu'e vale i le aulotu ona o nisi mafua'aga vaivai, ae ina ia mau pea le to'ovae o le femalamalama'ai o le faifeau ma le aulotu i la latou galuega tausoa fa'atasi. Ia lē tusitusilima ai i latou pe a lualuta le tai o le galuega a le Atua i faafitauli, a ia tupu le fetausi'ai felagolagomai ina ua 'aleaga fa'atasi i vavega o le alofa laveai o le Atua¹⁰ na fa'ailoa mai e le 'su'esu'ega ile aulotu'.

O le fesili: Pe lē o se faiga lelei lea e saga fa'amausali ai pea le osiga-feagaiga na faia i luma o le Atua ona o lana galuega paia? Pe lē o le ki lea i le femalamalama'ai o le aulotu ma le faifeau i o latou nafa tausī ua fa'apaiaina e le Atua i totonu o le feagaiga osi?

Ia manatua pea ma le loto fa'amaulalo, o le galuega fa'afaifeau a le EFKS ua ta'ialaina lava ele upu a le perofeta o Isaia ae na faitauina e Iesu i le sunako i Nasareta,

“Ua i o'u luga le Agaga o le Ali'i, aua ua na fa'au'u mai ia te au e folafola le tala lelei i e matitiva, ua auina mai a'u e ia e fa'amalolo i ē loto momomo, e tala'i le sa'olotoga i le tafeaga, ma ia pupula mata o e tauaso, e tu'u sa'oloto i ē ua fa'asauaina, e tala'i le tausaga e finagalo malie mai ai le Ali'i.” (*Luka 4:18 – 19*)

Ia manuia tele le mafutaga faafouina o lenei tausaga.

Fa'alepō A. Tuisuga
Kolisi i Malua

¹⁰ Oka Fauolo, *O Vavega O Le Alofa Lavea'i: O Le Tala Fa'asolopito O Le Ekalesia Fa'apotopotoga Kerisiano I Samoa*. (Apia: Malua Printing Press, 2005).

Tusi Sa Fa'aaogaina

- Ammerman, Nancy T., Jackson W. Carroll, Carl S. Dudley, & William McKinney. *Studying Congregations: A New Handbook*. Nashville: Abingdon Press, 1998.
- Cameron, Helen, Philip Richter, Douglas Davis, and Francis Ward, eds. *Studying Local Churches: A Handbook*. London: SCM Press, 2005.
- Fauolo, Oka. *O Vavega O Le Alofa Lavea'i: O Le Tala Fa'asolopito O Le Ekalesia Fa'apotopotoga Kerisiano I Samoa*. Apia: Malua Printing Press, 2005.
- Hopewell, James F. *Congregation: Stories and Structures*. London: SCM Press, 1987.
- Lyon, Brynolf. "What Is the Relevance of Congregational Studies for Pastoral Theology?". Chap. 19 In *The Blackwell Reader in Pastoral and Practical Theology* edited by James Woodward and Stephen Pattison. Victoria Australia: Blackwell Publishing, 2000.
- Nieman, James R. "Congregational Studies." In *The Wiley-Blackwell Companion to Practical Theology*, edited by Bonnie J Miller-McLemore. West Sussex, UK: Wiley-Blackwell Publishing Ltd, 2012.
- Patton, John. *Pastoral Care in Context: An Introduction to Pastoral Care*. Louisville, Kentucky: Westminster John Knox Press, 1993.
- Williams, John. "Congregational Studies as Resource and Critique for a Mission-Shaped Church." *ANVIL* 26, (2009): 243-53.